



Broj: 03-1-02-1-886-2/19
Sarajevo: 21.10.2019. godine

Kanton Sarajevo
Kabinet predsjedavajućeg i
zamjenika predsjedavajućeg

Ul. Reisa Džemaludina Čauševića 1
71000 Sarajevo

PREDMET: Objavljivanje odluka o dodjeli sredstava licima u stanju socijalne potrebe i kojima je pomoć potrebna u svrhu liječenja, mišljenje - *d o s t a v l j a s e*,

VEZA: Vaš akt broj: 01-05-35223/19 od 30.09.2019. godine

Agencija za zaštitu ličnih podataka u Bosni i Hercegovini (u daljem tekstu: Agencija) zaprimila je vaš akt veze u kojem je navedeno da ste shodno Uredbi o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo, u obavezi objavljivati odluke o dodjeli sredstava licima u stanju socijalne potrebe i kojima je pomoć potrebna u svrhu liječenja.

Od Agencije zahtijevate stav i mišljenje, da li objavljivanje odluka o dodjeli pomoći licima iz ove kategorije, predstavlja kršenje Zakona o zaštiti ličnih podataka, obzirom na njihov socijalni status, zdravstveno i imovno stanje.

Shodno tome, na osnovu člana 40. stav (2) tačka g) Zakona o zaštiti ličnih podataka ("Službeni glasnik BiH" broj: 49/06, 76/11 i 89/11), daje se sljedeće:

MIŠLJENJE

Zakon o zaštiti ličnih podataka (u daljem tekstu: Zakon) je opšti propis kojim su propisani pojmovi, osnovni principi, davanje ličnih podataka, prava nosioca podataka i druga pitanja u vezi sa zaštitom ličnih podataka.

Zakon reguliše obradu i zaštitu ličnih podataka i primjenjuje se na lične podatke koje obrađuju svi javni organi, fizičke i pravne osobe, osim ako drugi zakon ne nalaže drugačije.

U članu 4. Zakona propisani su osnovni principi obrade ličnih podataka kojih su obavezni da se pridržavaju svi kontrolori. Princip pravičnosti i zakonitosti, iz tačke a) navedenog člana, podrazumijeva obradu ličnih podataka na osnovu zakonskog propisa, koji se primjenjuje u određenoj oblasti, te da je obrada neophodna za ostvarivanje svrhe koja se tom obradom ličnih podataka želi postići.

Uredba o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo („Službene novine Kantona Sarajevo“ broj: 21/19, u daljem tekstu: Uredba), je donesena na osnovu Zakona o objavljivanju propisa i drugih općih akata u „Službenim novinama Kantona Sarajevo“ i to člana 2. stav (2) koji glasi: „Vlada kantona svojim propisom uređuje vrstu i postupak objavljivanja akata iz člana 2. ovog zakona i javnost rada organa Kantona, preduzeća, ustanova i drugih pravnih lica čiji je osnivač Kanton“. Pri tome u članu 2. su taksativno nabrojani propisi i drugi **opšti akti** koji se objavljuju u „Službenim novinama“.

Prema navedenom, predmet zakonskog propisa je objavljivanje zakona, drugih propisa i općih akata u „Službenim novinama Kantona Sarajevo“, dok je Uredbom u članu 5. stav (1) tačka a), kao izuzetak, propisano da su organi javnog sektora dužni objaviti na **web stranici** i pojedinačne akte koji nemaju karakter općeg akta: „*rješenja i odluke o odobravanju isplata svih vrsta naknada zaposlenim u organima javnog sektora*“.

Dakle, relevantan zakonski propis se odnosi na objavljivanje propisa i općih akata u „Službenim novinama Kantona Sarajevo“ i istim nije propisan pravni osnov za objavu pojedinačnih akata na web stranici, već je to kao izuzetak (za naknade zaposlenih u javnom sektoru), propisano Uredbom kao podzakonskim aktom.

Nesporno je da kada se radi o trošenju budžetskih sredstava, građani imaju pravo da u određenoj mjeri, na zakonit način, budu upoznati sa trošenjem tih sredstava.

Međutim, objavljivanje **ličnih podataka na web stranicama ne može se propisati podzakonskim aktom i zasnivati na proizvoljnosti**. Isto tako, „*javnost rada organa javnog sektora*“, ne znači objavljivanje na web stranici svih akata koje donose organi javnog sektora, bez bilo kakvih ograničenja.


Neprihvatljivo je da se na bilo koji način objave akti koji sadrže adresu prebivališta, JMB, lične podatke članova porodice, zdravstvene podatke i slično.

Shodno navedenom, mišljenja smo da **objava odluka o dodjeli sredstava licima u stanju socijalne potrebe i kojima je pomoć potrebna u svrhu liječenja, ne bi bila u skladu sa principom pravičnosti i zakonitosti**.

S poštovanjem,

Dostavljeno:

- Naslovu,
- a/a



Sarajevo / Сарајево, Dubrovačka broj 6 / Дубровацка број 6
tel/тел +387 33 726-250, fax/факс +387 33 726-251